

四庫全書

子部

欽定四庫全書

冊府元龜卷三百八十 宋 王欽若等 撰

將帥部

褒異第六

梁王茂為寧朔將軍江夏內史宋順帝時魏軍圍司州
茂從高祖拒之大破魏將王肅等遷輔國將軍復為驃
騎將軍都督江州諸軍事薨於州高祖甚悼惜之賻錢
三十萬布三百疋詔贈侍中太尉加班劔三十人鼓吹

一部

曹景宗為屯騎校尉齊明帝時魏主拓跋宏逼赭陽以
景宗為偏將每衝堅陷陣輒有斬獲以勲除游擊將軍
高祖即位景宗與冠軍王茂濟江圍郢城及高祖入頓
新城復與衆軍長圍六門城平拜散騎常侍右衛將軍
封湘西縣侯食邑二千六百戶仍遷持節都督郢司二
州諸軍事左衛將軍郢州刺史天監元年進號征西將
軍改封竟陵縣侯後為右將軍擊破魏大將楊大眼諸

城獻捷高祖振旅凱入增封四百戶并前為二千戶進爵為公詔拜侍中領軍給鼓吹一部七年遷侍中中衛將軍江州刺史赴任卒於道詔贈錢二十萬布三百疋追贈征北將軍雍州刺史開府儀同三司

柳慶遠為冠軍將軍征東長史從高祖軍東下身先士卒建康城平入為侍中領前軍將軍霸府建以為太尉從事中郎高祖受禪遷散騎常侍右衛將軍加征虜將軍封重安侯食邑千戶天監二年遷中領軍改封雲杜侯

四年加使持節都督雍州南北秦四州諸軍事征虜將
軍寧蠻校尉雍州刺史高祖餞於新亭謂白卿衣錦還
鄉朕無西顧之憂矣十年遷侍中領軍將軍給鈇鉞并
鼓吹一部十二年遷安北將軍寧蠻校尉雍州刺史卒
贈開府儀同三司喪還都武帝親出臨之

蕭穎胄齊和帝時為鎮軍將軍荊州刺史及義師之起
穎胄遣軍拒巴東太守蕭瓚等而高祖已平江郢圖建
康穎胄卒和帝贈穎胄丞相及高祖受禪詔追封巴東

郡開國公食邑三千戶

蕭穎達為冠軍將軍率師隨高祖圍郢城高祖已平江
郢及建康城以穎達為前將軍丹陽尹高祖受禪穎達
遷散騎常侍及大論功賞封穎達吳昌縣侯邑千五百戶
尋為侍中改封作唐侯縣邑如故遷征虜將軍後轉散
騎常侍左衛將軍俄復為侍中衛尉卿出為信威將軍
豫章內史秩中二千石頃之入遷信武將軍右衛將軍
卒車駕臨哭給東園祕器朝服一襲錢二十萬布二百

足追贈侍中中衛將軍鼓吹一部

蔡道恭齊和帝時為右衛將軍巴西太守魯休烈等自巴蜀連兵寇上明以道恭持節督西討諸軍事破休烈等降於軍門以功遷中領軍固辭不受出為使持節右將軍司州刺史高祖天監初論功封漢壽縣伯邑七百戶號平北將軍

楊公則齊世祖時為寧朔將軍扶風太守頃之荊州刺史巴東王子響構亂公則率師進討事平遷武寧太守

和帝即位授持節都督湘州諸軍事時高祖平郢城公則東下湘部諸軍多未賓從及公則還州然後諸屯聚並散天監元年進號平南將軍封寧都縣侯邑一千五百戶

鄧元起初為齊弘農太守平西軍事時西陽馬榮率眾緣江寇抄刺史蕭遙欣使元起率眾討平之遷武寧太守後加冠軍將軍率眾與高祖會于夏口高祖命元起圍郢城擊敗張冲和帝即位授冠軍將軍平越中郎將廣

州刺史遷給事黃門侍郎移鎮南堂西渚齊和帝
中興元年七月郢城降以本號為益州刺史仍為前軍
先定尋陽及大軍進至京邑元起築壘於建陽門與王
茂曹景宗等合長圍建康城平進號征虜將軍天監初
封當陽縣侯食邑一千二百戶又進號左將軍

張弘策為輔國將軍督後部軍事西臺建為步兵校尉
遷車騎諮議參軍高祖入頓石頭弘策屯門禁衛城平
高祖遣弘策先入清宮弘策申勒部曲秋毫無犯遷衛

尉卿加給事中天監初加散騎常侍洮陽縣侯邑二千二百戶

庾域為寧朔將軍從高祖平郢城霸府初開以為諮議參軍天監初封廣牧縣子後軍司馬出為寧朔將軍巴西梓潼二郡太守魏騎兵進襲巴西域固守百餘日魏軍退詔封二百戶

鄭紹叔為衛尉卿冠軍將軍時魏軍圍合肥紹叔以本號督衆軍鎮東關事平復為衛尉移鎮關南持節征虜

將軍司州刺史後徵為左將軍加通直散騎常侍領司
豫二州大中正紹叔至家疾篤詔於宅拜授輿載還府
中使醫藥一日數至尋卒於府舍高祖將臨其殯紹叔
宅巷狹陋不容輿駕乃止詔贈散騎常侍護軍將軍給
鼓吹一部東園祕器衣一襲朝服一具凶事所須隨絲
資給

呂僧珍為輔國將軍步兵校尉從高祖平郢城進僧珍
為前鋒既平建康城高祖命僧珍率所領先入清宮即

日以本官帶南彭城太守遷給事黃門侍郎領武賁中
郎將高祖受禪以為冠軍將軍前軍司封平固縣侯邑
一千二百戶天監四年大舉北伐五年命僧珍率羽林
勁勇出梁城其年冬以左衛將軍領太子中庶子僧珍
去家久表求拜墓高祖欲榮之使為本州乃授使持節
平北將軍南兗州刺史及疾病高祖車駕臨幸中使醫
藥日有數四既卒高祖即日臨殯詔贈驃騎將軍開府
儀同三司常侍鼓吹侯如故給東園祕器朝服一具衣

一襲喪事所須隨絲備辦高祖痛惜之言為流涕

柳惔齊和帝時為侍中領軍將軍高祖之鎮襄陽為惔
祖道帝解玉環贈之天監二年元會帝謂曰卿所佩玉
環是新亭所贈耶對曰既而瑞感宸衷臣謹服之無斃
帝因勸之酒惔時未卒爵帝曰吾嘗比卿劉越石近辭
卮酒邪罷會封曲江縣侯邑千戶後出為使持節安南
將軍湘州刺史卒于州高祖為素服舉哀贈侍中撫軍
將軍給鼓吹一部

柳忱者悛之弟也齊和帝時為冠軍將軍南平太守從高祖平郢州高祖踐阼以忱為五兵尚書領驍騎將軍論建義功封州陵伯邑七百戶

韋叡為輔國將軍豫州刺史領歷陽太守高祖詔率豫州之衆擊魏軍所獲軍實牛馬不可勝紀以功增封七百戶進爵為侯天監十七年為散騎常侍護軍將軍尋給鼓吹一部入直殿省及卒高祖即日臨哭甚慟賜錢十萬布二百疋東園祕器朝服一具衣一襲喪事取給

於官遣中書舍人監護贈侍中車騎將軍開府儀同三

司

王珍國齊明帝時為輔國將軍會稽太守王敬則反珍國率衆拒之敬則平遷寧朔將軍高祖義師起以功授右衛將軍後遷護軍將軍通直散騎常侍丹陽尹卒詔贈車騎將軍給鼓吹一部贈錢十萬布百疋

馬仙琕為振遠將軍時朐山民殺琅邪太守劉昕以城降魏高祖詔仙琕討之魏徐州刺史盧昶以衆十餘萬

赴馬仙理與戰累破之振旅還京師遷太子左衛率進
爵為侯增邑六百戶

馮道根為驍騎將軍封增城縣男南梁太守高祖天監
二年魏將黨德宗率眾奄至城下道根戰敗之遷輔國
將軍六年魏攻鍾離詔道根為前驅魏軍敗績進爵為
伯改封魏寧縣八年拜豫州刺史領汝陰太守後徵為
散騎常侍左軍將軍卒於官是日輿駕春祠二廟及出
宮有司以聞帝問中書舍人朱异曰吉凶同日今可行

乎對曰昔柳莊寢疾衛獻公當祭請尸曰有臣柳莊非寡人之臣社稷之臣也聞其死請往不釋祭服而往遂以禘之道根雖未為社稷臣亦有勞王室臨之禮也帝即駕幸其宅哭之甚慟

裴邃齊東昏時為輔國將軍廬江太守時魏將呂頗率眾五萬奄來攻郡邃麾下距破之加右將軍又征邵陽洲擊魏眾大破之以功封夷陵縣子邑三百戶遷將軍長史高祖時累遷至宣毅將軍大軍北伐以邃督征討

諸軍事卒於軍中追贈侍中左衛將軍給鼓吹一部進爵為侯增邑七百戶

裴之橫為河東內史隨王僧辨拒侯景於巴陵景退遷持節平北將軍東徐州刺史中護軍封豫章侯邑二千戶

夏侯亶為中護軍與湛僧智襲破魏軍於淮肥以亶為使持節都督豫州緣淮南豫霍義定五州諸軍事雲麾將軍大通二年進號平北將軍三年卒高祖聞之即日

素服舉哀贈車騎將軍

蘭欽為東宮直閣大通都督衡州三郡兵討平桂陽陽山始興叛蠻封安懷縣男邑五百戶又以魏將托跋滕寇襄陽仍勅赴援除持節督南梁南北秦沙四州軍事光烈將軍平西校尉梁南秦二州刺史增封五百戶進爵為侯破降魏梁州刺史元羅梁漢底定進號智武將軍增封二千戶後為安南將軍廣州刺史卒詔贈侍中中衛將軍鼓吹一部

王僧辯為征東將軍江州刺史大破侯景衆世祖加僧
辯侍中尚書令征東大將軍給鼓吹一部後既平湘州
旋于江陵因被詔會衆軍西討督舟師二萬輿駕出天
居寺餞行及為鎮軍將軍破北齊文宣衆振旅于建業
承聖三年二月甲辰詔曰贊俊遂賢稱於秦典自上安
下聞之漢制所以仰協台曜俯佐弘圖使持節侍中司
徒尚書令都督揚南徐東揚三州諸軍事鎮衛將軍揚
州刺史永寧郡開國公僧辯器宇凝深風格詳遠行為

士則言表身文學貫九流武該七畧頃歲征討自西徂
東師不疲勞民無怨讟王業艱難實兼夷險宜其燮此
中台膺茲上將寄之經野贊我朝猷可授太尉車騎大
將軍

杜崩為武州刺史封枝江縣侯隨領軍王僧辯東討侯
景至巴陵景遁加侍中進爵為公仍隨僧辯追景至石
頭景敗崩人據臺城景平加散騎常侍江州刺史卒詔
曰崩京兆舊姓元凱苗裔家傳學業世載忠貞自驅傳

江渚政號廉能推轂淺源實聞清靜奄致殞喪惻愴于懷可贈車騎將軍加鼓吹一部謚曰武

杜龕崩第二兄岑之子也為忠武將軍大破侯景景遂東奔論功為最授平東將軍東揚州刺史益封一千戶陳杜僧明梁元帝時為陵野將軍時侯景遣于慶等寇南江高祖頓豫章命僧明為前驅所向克捷高祖表僧明為長史仍隨東討軍至蔡州僧明率麾下燒賊水門大艦及景平以功除員外散騎常侍明威將軍南充州

刺史進爵為侯增邑并前五百戶領晉陵太守元帝承
聖二年從高祖北圍廣陵加使持節遷通直散騎常侍
平北將軍餘如故荊州陷高祖使僧明率吳明徹等隨
侯瑱西援於江州病卒贈散騎常侍世祖即位追贈開
府儀同三司天嘉二年配享高祖廟廷子晉嗣

周文育為雄信將軍時侯景將王伯醜據豫章文育擊
走之遂據其城累前後功除游擊將軍員外散騎常侍
封連遷縣侯邑五百戶高祖軍至白茅灣命文育與杜

僧明常為軍鋒平南陵鵲頭諸城及至姑熟與景將侯子鑿戰破之景平投通直散騎常侍改封南移縣侯邑千戶拜信義太守後除督南豫州諸軍事武威將軍率兵會高祖拒齊兵與徐嗣徽戰於白城嗣徽等退加平西將軍進爵壽昌縣公并給鼓吹一部

侯安都為猛烈將軍隨高祖鎮京口除蘭陵太守高祖謀襲王僧辯諸將莫知者唯與安都定計安都既擒僧辯以功授使持節散騎常侍督南徐州諸軍事仁威將

軍南徐州刺史及高祖與齊軍戰於幕府山命安都領步兵橫擊齊軍大敗以功進爵為侯增邑五百戶給鼓吹一部又進號平南將軍改封曲江縣公仍督水軍討蕭勃頻戰克師還以功進號鎮北將軍加開府儀同三司至世祖時累封桂陽郡公及東陽太守留異叛奉詔東討異振旅而歸以功加侍中征北大將軍增邑并前五千戶

侯瑱梁元帝時為武臣將軍隨都督王僧辯討侯景大

敗其軍以功除南豫州刺史鎮于姑熟大敗齊將郭元
建於東關除使持節鎮北將軍給鼓吹一部增邑二千
戶高祖永定二年進位司空與領軍將軍徐度討王琳
輿駕幸石頭親送填及世祖即位進授太尉增邑千戶
又為西討都督敗周將獨孤盛軍以功授使持節都督
湘桂郢巴武沅六州諸軍事湘州刺史改封零陵郡公
邑七千戶天嘉二年以疾表求還朝三月於道卒贈侍
中驃騎大將軍大司馬加羽葆鼓吹一部班劍二十人

卷三百八十一
給東園祕器其年九月配享高祖廟庭

歐陽頎為始興內史高祖之討蔡路養李遷仕也頎率
兵渡嶺以助高祖及路養等平頎有功梁元帝承制以
頎為持節通直散騎常侍都督東衡州諸軍事雲麾將
軍東衡州刺史新豐縣伯邑四百戶高祖永定三年增
都督衡州諸軍事開府儀同三司世祖嗣位進號征南
將軍改封陽山郡公邑一千五百戶又給鼓吹一部天
嘉四年薨贈侍中車騎大將軍司空廣州刺史

吳明徹梁元帝時為戎昭將軍安州刺史敬宗時徹隨周文育討杜龕張彪等東道平授使持節散騎常侍安東將軍南兖州刺史封安吳縣侯高祖受禪拜安南將軍世祖時累遷中領軍廢帝即位授領軍將軍尋遷丹陽尹及湘州刺史華皎陰有異志詔授明徹使持節都督湘桂武三州諸軍事安南將軍湘州刺史給鼓吹一部率兵討平皎授開府儀同三司進爵為公孝宣太建元年授鎮南將軍四年徵為侍中會朝議北伐公卿互

有異同明徹決策請行五年詔加侍中都督征討諸軍
事仍賜女樂一部總統衆軍十餘萬發自京師軍至秦
郡尅其水柵齊遣大將軍尉破胡將兵為援明徹破走
之秦郡乃降高祖以秦郡明徹舊邑詔具太牢令拜祠
上冢文武羽儀甚盛鄉里以為榮進尅仁州投征北大
將軍進爵南平郡公增邑并前二千五百戶次平峽石
岸二城進逼壽陽生擒齊將王琳詔加都督豫合建光
朔北徐六州諸軍事車騎大將軍豫州刺史增封并前

三千五百戶六年自壽陽入朝輿駕幸其第賜鍾磬一部米萬斛絹布二十疋七年進攻彭城軍又大破之八年進位司空

周鐵虎梁元帝時為仁威將軍從王僧辯克定京邑平陸納於湘州以前後功進爵為侯增邑并前五百戶

程靈洗梁元帝時為雲麾將軍禽賊帥趙乘乾以功授持節散騎常侍都督青冀二州刺史增邑并前一千戶敬帝時遷信武將軍助防京口及平徐嗣徽有功除南

丹陽太守封遂安縣侯增邑并前一千五百戶高祖未討王琳於南陵破之以功授使持節都督南豫州緣江諸軍事信武將軍南豫州刺史世祖天嘉四年擊走周迪五年遷中護軍廢帝即位進號雲麾將軍華皎之叛也遣使招誘靈洗靈洗斬皎使以狀聞朝廷深嘉其忠增其守備給鼓吹一部又進攻周沔州克之禽其刺史裴寬以功進號安西將軍改封重安縣公增邑并前二千戶光大二年卒贈鎮西將軍開府儀同三司宣帝大

建四年詔配享高祖廟庭

程文季者靈洗之子也世祖天嘉中為貞毅將軍鎮東府中兵參軍時陳寶應與劉異連結世祖遣文季為前鋒所向克捷戰功居多還轉府諮議參軍領中直兵孝宣太建二年為豫章內史隨都督章昭達往荊州征蕭巋以功加通直散騎常侍安遠將軍增邑五百戶五年隨都督吳明徹圍壽陽每戰常為前鋒齊人深憚之以功除散騎常侍明威將軍增邑五百戶

黃法氈為信武將軍高祖永定二年王琳遣李欽樊猛
余孝頃等攻周迪且謀取法氈法氈率兵援迪禽孝頃
等三將進號宣毅將軍增邑并前一千戶給鼓吹一部
又以拒王琳功授平南將軍開府儀同三司至孝宣大
建五年為征南大將軍與北伐都督吳明徹出秦郡大
破齊軍以功加侍中改封義陽郡公邑二千戶其年遷
都督合霍二州諸軍事增邑五百戶七年徙都督豫建
光朔合北徐州六州諸軍事八年薨贈侍中中權大將

軍司空

淳于量梁元帝時為信威將軍與都督王僧辯併力克平侯景承聖元年以功授左衛將軍謝沐縣侯邑五百戶高祖受禪授持節散騎常侍平西大將軍給鼓吹一部少帝光大元年為持節征南大將軍西討大都督平華皎并降周將長胡公拓跋定等以功授侍中中軍開府儀同三司進封醴陵縣公增邑一千戶孝宣大建五年為中護大將軍吳明徹之西伐也量贊成其事遣第

六子岑率所領從軍淮南克定改封始安郡公增邑千五百戶

章昭達吳興武康人也高祖討王僧辯令世祖還長城僧辯既誅杜龕遣其將杜泰來攻長城世祖拒之命昭達總知城內兵事及泰退走因從世祖東進軍吳興以討龕龕平又從世祖東討張彪於會稽克之累功除明威將軍定州刺史天嘉元年追褒長城之功封欣樂縣侯邑一千戶尋隨侯安都等討平王琳昭達冊勳第一

二年除使持節散騎常侍都督郢巴武沅四州諸軍事智武將軍郢州刺史增邑并前五百戶尋進號平西將軍又詔征周迪於臨川敗走之徵為護軍將軍給鼓吹一部改封邵武縣侯增邑并前二千戶四年陳寶應周迪復共寇臨川又以昭達為都督討迪至東興嶺而迪退又討禽寶應遂克定閩中以功授前將軍開府儀同三司少帝即位遷侍中征南將軍改封邵陵郡公華皎之反也昭達又平之進號征南將軍增邑并前二千五百

戶及歐陽紇據有嶺南詔昭達都督衆軍討平之以功
進車騎大將軍遷司空孝宣大建三年薨贈大將軍增
邑五百戶給班劔二十人四年配享世祖廟庭

胡穎梁敬帝太平元年為仁威將軍兼丹陽尹高祖受
禪兼左衛將軍永定三年隨侯安都征王琳於宮亭破
賊帥常衆愛世祖嗣位除散騎常侍吳興太守其年六
月卒贈侍中中護軍配享高祖廟庭

徐度梁元帝時為寧朔將軍合州刺史侯景之亂每戰

有功加通直散騎常侍封廣德縣侯邑五百戶遷散騎
常侍高祖鎮朱方除信武將軍蘭陵太守高祖平王僧
辯度與侯安都為水軍敬帝紹泰元年高祖東討杜龕
奉敬帝幸京口以度領宿衛并知留府事徐嗣徽等引
齊寇濟江度隨衆軍破之於郊壇以功除信威將軍郢
州刺史兼領吳興太守尋遷鎮右將軍徐州緣江諸軍
事鎮北將軍南徐州刺史給鼓吹一部世祖天嘉元年
增邑千戶以平王琳功改封湘東郡公邑四千戶

徐敬成者度之子也世祖天嘉中為湘東郡公隨章昭
達征陳寶應晉安平除貞威將軍豫章太守敬帝時累
遷貞威將軍吳興太守隨都督吳明徹北討以功加通
直散騎常侍雲旗將軍增邑五百戶又進號壯武將軍
安州刺史卒贈散騎常侍

杜稜梁元帝時為仁威將軍高祖東征杜龕留稜居守
綏撫士卒未嘗解甲帶賊平以功除通直散騎常侍右
衛將軍丹陽尹世祖即位以預建立之功改封永城縣

侯增邑五百戶

徐世譜梁元帝時為散騎常侍領水軍從司徒陸法和討侯景大敗景軍以功除使持節信武將軍信州刺史封魚復縣侯邑五百戶仍隨王僧辯東下恆為軍鋒又破景將侯子鑒於湖熟侯景平後以功除衡州刺史增邑并前一千戶高祖永定二年遷護軍將軍世祖嗣位加特進號右將軍天嘉元年增邑百戶

周敷梁元帝時為武侯將軍周祖受禪王琳據有上流

熊曇朗殺周文育據豫章數與周迪黃法氈等進兵圍曇朗屠之王琳平授散騎常侍平西將軍豫章太守世祖天嘉二年詣闕進安西將軍給鼓吹一部賜以女妓金帛令還鎮豫章

荀朗梁元帝時為安南將軍高祖入輔朗與侯安都等大破齊軍高祖即位賜爵興寧縣侯邑二千戶世祖即位又與安都拒王琳琳平遷使持節安北將軍散騎常侍都督霍晉合三州諸軍事天嘉六年卒贈豫州刺史

陳慧紀世祖時為明威將軍副司空章昭達征安蜀成都督於荊州燒青泥船艫少帝即位以功除持節通直散騎常侍宣遠將軍豐州刺史增邑并前一千戶

韋載梁元帝時為建威將軍尋陽太守隨都督王僧辯東討侯景載率太原高塘新蔡三郡兵與僧辯會于梁山景平除冠軍將軍琅邪太守

韓子高世祖元嘉二年為壯武將軍隨侯安都征留異平之除假節貞毅將軍東陽太守五年章昭達等自臨

川征晉安子高自安泉嶺會于建安晉安平以功遷通直散騎常侍進爵為伯增邑并前四百戶

陸子隆世祖時為明威將軍隨都督章昭達討周迪大破賊徒晉安平以功最多遷假節督武州諸軍事尋改封朝陽縣伯邑三百戶

錢道戡為輕車將軍孝宣初以步軍都督討歐陽紇之亂紇平除左衛將軍太建二年隨章昭達征蕭巋攻安蜀城降之以功加散騎常侍仁威將軍增邑并前九百

戶又授使持節都督郢巴武三州諸軍事王師北討道
戢與儀同黃法氈圍歷陽城既平因以道戢鎮之以功
加雲麾將軍增邑并前一千一百戶

裴忌高祖時為左衛將軍世祖天嘉初出為持節南康
內史時義安太守張紹賓據郡反世祖以忌為持節都
督嶺北諸軍事率眾討平之除散騎常侍司徒左長史
孫瑒吳郡人也為戎昭將軍梁元帝時從王僧辯討侯
景力戰有功除員外散騎常侍封富陽縣侯邑一千戶

又遷衡州平南府司馬破黃洞蠻賊有功除東莞太守
高祖受禪遷安西將軍郢州刺史世祖即位授使持節
散騎常侍安南將軍湘州刺史請入朝徵為侍中領軍
未拜而世祖從容謂瑒曰昔朱買臣願為本郡卿豈有
意乎仍改授持節安東將軍吳郡太守給鼓吹一部及
將之鎮乘輿幸近畿餞送鄉里榮之至後主時為五兵
尚書領右軍以年老累乞骸骨優詔不許禎明元年卒
官後主臨哭盡哀贈護軍將軍侍中如故給鼓吹一部

朝服一具衣一襲喪事量加資給

司馬申梁元帝時為開遠將軍王僧辯之討陸納也申在軍中于時賊衆奄至左右披靡申躬蔽僧辯蒙楯而前賊乃退除散騎侍郎至高祖天嘉中累遷員外散騎常侍後主時始興王叔陵之肆逆也事既不捷出據東府申馳召右衛蕭摩訶帥兵先至追斬之因入城中收其府庫後主深嘉之以功除太子左衛率封文始伯邑四百戶

蕭摩訶世祖時為巴山太守至孝宣太建五年衆軍北伐摩訶隨都督吳明徹濟江攻秦郡仍擊退齊師以功授明毅將軍員外散騎常侍封庶平縣伯邑五百戶尋進爵為侯轉太僕卿七年又隨明徹進圍宿豫擊走齊將王康德以功除進熙太守九年明徹進圍宿軍呂梁與齊人大戰摩訶率七騎先入齊衆大潰以功授持節武毅將軍譙州刺史及後主時始興王叔陵為逆摩訶勒兵追斬之以功授散騎常侍車騎大將軍封綏遠郡

公邑三千戶叔陵素所蓄聚金帛累巨萬後主悉以賜之尋改授侍中驃騎大將軍加左光祿大夫舊制三公黃門閣聽事置鴟尾後主持詔摩訶開黃閣門施行馬聽事寢堂並置鴟尾

樊毅梁末為假節威戎將軍右中郎將代兄俊為梁興太守領三州遊軍隨宜豐侯蕭循討陸納於三州力戰斬千餘級擊鼓申令衆乃退以功授持節通直散騎常侍貞威將軍封夷道縣伯邑三百戶

樊猛者毅之弟也梁末為威戎將軍梁安南侯蕭方矩為湘州刺史以猛為司馬會武陵王蕭紀舉兵自江漢東下方矩遣猛率湘郢之卒隨都督陸法和進軍以拒之猛手擒斬紀父子三人以功授游騎將軍封安山縣伯邑一千戶仍遣軍撫定梁益蜀境悉平軍還遷持節散騎常侍輕車將軍司州刺史進爵為侯增邑并前二千戶至孝宣太建初遷武毅將軍領長沙內史尋隸章昭達西討江陵以功封富川縣侯邑五百戶

魯廣達梁元帝時為壯武將軍晉州刺史隨王僧辯討
平侯景加員外散騎常侍高祖受禪授征遠將軍又除
假節信武將軍北新蔡太守隨吳明徹討周迪於臨川
每戰功最多仍代兄悉達為吳州刺史封中宿縣侯邑
五百戶少帝光大元年授通直散騎常侍都督南豫州
諸軍事南豫州刺史時華皎稱兵上流詔司空淳于量
率衆軍進討軍至夏口廣達首率驍勇直衝賊軍皎平
授持節智武將軍都督巴州諸軍事巴州刺史孝宣大

建初與儀同章昭達入峽口拓定安蜀等諸州鎮以功
增封并前二千戶

冊府元龜卷三百八十

欽定四庫全書

冊府元龜卷三百八十一 宋 王欽若等撰

將帥部

褒異第七

後魏長孫嵩道武時為南部大人累著軍功征中山除
冀州刺史賜爵鉅鹿公

長孫肥為中領軍將軍從道武征中山平之以功賜爵
琅邪公遷衛尉卿改爵盧鄉討破妖賊趙準於九門除

肥鎮遠將軍兗州刺史給步騎一萬南循許昌畧地至
彭城還鎮兗州肥善策謀勇冠諸將前後征討未嘗失
敗南平中原西摧羗寇肥功居多賞賜奴婢數百口畜
物以千計天賜五年卒陪塋金陵

王建為左大夫從道武征伐諸國破二十餘部以功賜
奴婢數十口雜畜數千從征衛辰破之賜僮五十戶為
中部大人又從征慕容寶拜冠軍將軍烏丸庫偃宮鳴
聚黨為寇詔建討平之遷太僕徙為真定公加散騎常

侍冀青二州刺史卒陪塋金陵

奚牧為輔國將軍畧地晉川獲慕容寶丹陽王買得及
離石護軍高秀和於平陶以軍功拜并州刺史賜爵任
城公

張濟為勝兵將軍頻從車駕北伐濟功居多賞賜奴婢
百口馬牛數百羊二千餘口

庾岳為外朝大人討擒離石胡帥呼延鐵西河胡帥張
崇等以功賜爵西昌公進號征虜將軍又討反人張超

清河太守傅世竝破平以岳為鄴行臺及罷以所統六郡置相州即拜岳為刺史天賜四年詔賜岳舍地於南宮

和跋時為龍驤將軍賜爵日南公從平中原以功進為尚書鎮鄴又逆擊慕容德大破之擒其將士千餘人改封定陵公又與常山王遵討破賀蘭部別帥木易干出為平原太守道武寵遇跋冠諸將

長孫道生明元初為南統將軍世祖初進爵汝陰公遷

廷尉卿後征蠕蠕大捷而還太武征赫連昌為前驅遂
平其國昌弟定走保平涼宋文帝遣將到彥之王仲德
寇河南以敕定詔道生與丹陽王太之屯河上以禦之
遂誘宋將檀道濟邀其前後追至歷城而還除司空加
侍中進封上黨王薨贈太尉

丘堆為散騎常侍鎮并州赫連屈牙遣三千騎寇河西
堆自并州與游擊將軍王雒生擊走之以功賜爵為侯
屈恒歷官公正為鎮東大將軍與襄城公盧魯元俱賜

甲第明元數臨幸賞賜隆厚

娥清為中領軍時明元南巡幸鄴清與宋兵將軍周幾等渡河畧地至湖陸高平民屯聚林藪拒射官軍清等因誅數千家虜獲萬餘口賜爵須昌侯太武初清自枋頭還京師假征南將軍進為東平公又討蠕蠕大獲而還轉宗正卿後詔清鎮并州討山胡白龍於西河斬白龍父及其將帥遂屠其城遷平東將軍

周幾為寧朔將軍破毛德祖於土樓以功賜爵交阯侯

進號宋兵將軍率雒州刺史于栗磾以萬人襲陝城卒于軍軍人無不嘆惜之歸塋京師追贈交阯公

奚斤初從道武征中原以斤為征東長史拜越騎校尉典宿衛禁旅從征高車諸部大破之又破庫狄宥連部又進擊侯莫陳部俘虜十餘萬至大峨谷置戍而還遷都水使者明元即位為鄭兵將軍蠕蠕犯塞令斤等追之拜天部大人進爵為公命斤出入乘輅軒備威儀導從太武之為皇太子臨朝以斤為左輔時宋少帝立其

大臣不附乃收宋武帝前侵河南地假斤節都督前
鋒諸軍事司空公晉兵大將軍南征自魏國初大將行
師唯長孫嵩拒宋武斤征河南獨給漏刻及十二牙旗
後為萬騎大將軍征平涼州戰功賜僮隸七十戶太武
以斤元老賜安車平決刑獄諮訪朝政

豆代田初為明元內細射與奚斤前鋒先入擒宋將毛
德祖并長史司馬二人以功遷內三郎又從討赫連昌
乘勝追賊入其宮太武壯之拜勇武將軍後從駕平昌

以戰功賜奴婢五十口黃金百斤銀百斤神麈中討蠕
蠕賜爵關中侯從討平涼擊破赫連定得奚斤等太武
以定妻賜之詔斤膝行授酒於代田勅斤曰全爾身命
者代田功也改爵井陘侯加散騎常侍右衛將軍領內
都幢將從討和龍戰功居多遷殿中尚書賜奴婢六十
口以前後軍功進爵長廣公加平東將軍後為統萬鎮
大將軍

奚烏侯為建義將軍賜爵夷餘侯從征蠕蠕及赫連昌

以功進爵城陽公加員外散騎常侍出為虎牢鎮將文
成興光中卒陪塋金陵

叔孫建為征南大將軍都督冀青徐濟四州諸軍事南
方憚其威畧大延三年薨太武悼惜之賜塋金陵

長孫翰初明元時為平南將軍率衆鎮北境威名甚著
後為都督北部諸軍事平北將軍真定侯給殿中十隊
加旌旗鼓吹蠕蠕每犯塞翰拒擊有功進爵為公太武
即位徵還京師進封平陽王加安集將軍蠕蠕大檀入

寇雲中太武遣翰襲戰大檀奔走神麈三年薨帝深見
悼惜為之流涕親臨其喪禮賙賻賜有加陪塋金陵

長孫陳為羽林郎征和龍賊自西門出將犯外圍陳擊
退之追斬至其城下以功賜爵五等男又從征涼州為
都督將領大官遷殿中給事中進號為子

長孫蘭為中散常從征伐以破平涼功賜爵睢陽子加
奮威將軍

長孫石雒為都將從征赫連昌以功拜樂部尚書賜爵

臨淮公加寧西將軍

長孫真為中散從征平涼以功賜爵臨城子拜員外散騎常侍廣武將軍

穆崇為龍驤將軍進爵長樂侯從駕西征白龍北討蠕蠕以功加散騎常侍鎮北將軍進爵建安公文成時為征西大將軍獻文天安元年崇卒贈征西大將軍

和歸為統萬將軍賜爵成臯男與西平公安頡攻虎牢拔之進爵高陽侯

王度為殿中給事遷尚書從征赫連昌討蠕蠕有功賜爵濟陽公加散騎常侍平南將軍

宿沓干為虎賁幢將從征平涼有功拜虎威將軍侍御郎賜爵漢安男轉中散遷給事兼領二曹從駕討和龍以功賜奴婢七十戶

來大千為常侍從討蠕蠕戰功居多遷征北大將軍賜爵廬陵公延和初車駕北伐大千為前鋒大破虜軍後吐京胡反以大千為都將討平之在吐京卒喪還停於

平城南太武出還見而問之左右以對太武悼嘆者良
久詔曰大千忠勇盡節功在可嘉今聽其喪入殯城內
贈司空

周觀為北鎮軍將太武初從討蠕蠕以軍功進為都副
將鎮雲中神廳中又討蠕蠕大獲增爵為侯從征平涼
進爵金城公遷為都將從破離石胡加散騎常侍

問大肥為都將擊大檀大破之還至渴侯山遂討東部
高車於已尼陂又征平涼有功太武將拜大肥為王遇

疾而卒追贈中山王

于栗磾自道武登國初為冠軍將軍與寧朔將軍公孫
蘭領步騎二萬潛自太原從韓信故道開井陘關路襲
慕容寶於中山既而車駕後至見道路修理大悅即賜
其名馬趙魏平定道武置酒高會謂栗磾曰卿即吾之
黥彭也大賜金帛明元永興中關東羣盜大起西河反
叛栗磾受命征伐所向皆平即以本號留鎮平陽尋轉
鎮遠將軍河內鎮將賜爵新城男奚斤之征虎牢別率

所部攻王涓之於金墉涓之棄城遁走遷豫州刺史進
爵新安侯太武之征赫連昌粟磾與宋兵將軍周幾襲
陝城乘勝長驅仍至三輔進爵為公加安南將軍平統
萬遷蒲坂鎮將後遷鎮南將軍卒賜東園祕器朝服一
具衣一襲贈太尉

陸真為內三郎數從征伐所在摧鋒陷陣前後以功屢
受賞賜太武太平真君中從討蠕蠕以功賜爵關內侯
宋將王玄謨寇滑臺真從太武討之至江真再破其軍

拜建武將軍石城子還攻盱眙真功居多遷給事中

陳建為下大夫內行長太武討山胡白龍建以身捍賊
殺賊數人太武壯之賜戶二千

司馬悅為鎮遠將軍豫州刺史悅與鎮南將軍元英攻
義陽克之以悅為征虜將軍郢州刺史時梁武帝遣其
豫州刺史馬仙琕等率衆一萬於三關起城及其輔國
將軍濟陰太守薊沛精卒二千戍之悅令西關統軍諸
靈鳳掩擊敗之詔曰司馬悅首謀義陽征畧有捷且違

京既久屢請入朝可遂此志聽其赴闕尋詔以本將軍
為豫州刺史論義陽之勲封漁陽縣開國子食邑三百
戶

司馬天助為平東將軍破宋將閻萬齡軍前後多所虜
獲拜侍中都督青徐兗三州諸軍事

李韶字元伯呂苟兒反於秦州除撫軍將軍西道都督行
秦州事與右衛將軍元麗率衆討平之尋即真璽書勞
勉

陸侯為龍驤將軍與西平安頡督諸軍攻虎牢克之
賜爵建鄴公拜冀州刺史又為安定鎮大將追討叛羌
金崖等皆獲之拜散騎常侍後安定盧永劉超等叛詔
加都督秦雍諸軍事遂平永超等太武大悅徵還京師
轉外都大官文成踐祚拜征西大將軍進爵東平王
毛脩之為吳兵將軍領步兵校尉從太武征平涼有功
遷散騎常侍前將軍又加冠軍將軍從討和龍別破三
堡賜奴婢牛羊

卷三百八十一
羅斤為平西將軍平涼州攻城野戰多有克捷以功賜爵帶方公

伊馥為殿中尚書常典宿衛從太祖幸瓜步頻有戰功進爵鎮軍將軍

荀頽為中散從太武南征為前鋒都將每臨敵對戰常先登陷陣帝至江賜爵建德男加寧遠將軍

韓茂為虎賁中郎將從太武征赫連昌以功賜茂爵蒲陰子加強弩將軍遷侍輦郎又從征統萬大破之及從

平平涼茂所衝莫不應弦而殪繇是太武壯之拜內侍
長進爵九門侯從征蠕蠕頻戰大捷戰功居多遷司衛
監錄前後功拜散騎常侍殿中尚書進爵安定公

呂溫為幢將從太武征赫連昌先登陷陣每戰必捷以
功拜宣威將軍奉車都尉

尉眷為安北將軍出鎮北境與平陽長孫翰擊蠕蠕別
帥大獲而還又擒赫連昌以功拜寧北將軍加散騎常
侍進爵源陽公又從征和龍督萬騎前驅慰喻降二千

餘戶尋為假節加侍中都督豫雒二州及河內諸軍事
安南將軍開府鎮虎牢又張掖王禿髮保周之反也率
師討殺之詔眷留鎮涼州加都督涼沙河三州諸軍事
安西將軍領護羌校尉轉敦煌將文成時率師北擊伊
吾克其城大獲而還尋拜侍中太尉進爵為王文成以
眷元老賜杖履上殿和平四年薨文成悼惜之贈大將
軍

司馬楚之為征南將軍徵入朝會南藩諸將表宋文帝

欲來侵以楚之為使持節安南大將軍封琅琊王屯潁川以拒之其長史臨邑子步還表曰楚之渡河百姓思舊義衆雲集汝潁以南望風翕然回首革面斯誠陛下應天順民聖德廣被之所至也道武大悅璽書勞勉賜前後部鼓吹後為鎮西將軍雲中鎮大將在邊二十餘年以清儉著聞文成和平五年卒帝悼惜之贈都督梁益秦寧四州諸軍事征南大將軍領護西戎校尉揚州刺史陪葬金陵

李寶文成初代司馬文思鎮懷荒授鎮北將軍大安五年薨年五十三詔賜命服一襲贈以本官

于雄拔為外都大官文成詔與南陽王惠壽督四州之衆討平隴西屠各王景文等拜侍中殿中尚書

呂雄拔文成未為平原鎮都將隨尉元攻宋將張永于五原大敗之賜爵成武侯加建義將軍

慕容白曜獻文時為征南大將軍擊降宋將崔道固等

以功拜青州刺史

沈文秀以功拜都督青齊東徐州諸軍事開府青州刺史

尉撥為涼州軍將介休縣男擊吐谷渾以功進爵為子
遷杏城鎮將大收民和文成以撥清平有惠績賜以衣
服獻文即位為北征都將南攻懸瓠破宋將朱湛之水
軍三千人拜懸瓠鎮將加員外散騎常侍進爵安城侯
獻文嘉其聲効復賜衣服

源賀自太武時為龍驤將軍從擊叛胡白龍又討吐京

胡皆先登陷陣進號平西將軍太武征涼州以賀為鄉
導陳攻戰之計賀率精騎歷諸部招慰下三萬餘落涼
州平遷征西將軍進號西平公又從征蠕蠕討蓋吳諸
賊皆有功拜散騎常侍文成時出為征南將軍冀州刺
史封隴西王孝文時上書以年老稱病乞骸骨許之又
給衣藥珍羞太和元年二月療疾於溫湯孝文遣使者
屢問消息太醫視病三年秋卒贈侍中太尉隴西王印
綬贈雜帛五百疋賜輜輶車及命服溫明秘器陪塋于

金陵

于烈為領軍孝文詔以本官從征荆沔加鼓吹一部宛
鄧既平車駕還雒論功加散騎常侍金紫光祿大夫

畢衆敬為寧南將軍兗州刺史獻文皇興二年朝京師
因留之賜甲第一區後孝文太和中以篤老乞還桑梓
引見於皇信堂賜以酒饌車一乘馬三匹絹二百疋勞
遣之及卒詔于兗州賜絹一千疋以供塋事

奚康生以中堅將軍時吐京胡反康生拒戰破之遷為

統軍又擊殺齊將張伏護賞帛一千疋頻戰再退其軍
賞三階帛五百疋又齊將裴叔業圍渦陽勅康生馳往
赴援一戰破之賞二階帛一千疋又拔梁城合肥雒口
三戍以功遷征虜將軍封安武縣開國男食邑一百戶
出為南青州刺史梁遣軍主徐濟寇邊康生率將出討
破之生擒濟賞帛千疋又以梁副將張惠紹寇徐州詔
康生為武衛將軍一戰敗之還京召見宴會賞帛千疋
賜驂騮御胡馬一匹出為平西將軍轉涇州刺史時梁

直閣將軍徐玄明戍於郁州殺其刺史張稷以城內附
孝文詔遣康生迎接賜細御銀纏槊一張并棗柰果面
勅曰果者果如朕心棗者早遂朕意

劉昶為使持節都督吳越楚彭城諸軍事大將軍固辭
詔不許又賜布千疋及發孝文親餞之命百僚賦詩贈
昶又以其文集一部賜昶孝文因以所製文筆示之謂
昶曰時契勝殘事鍾文業雖則不學欲罷不能晚思一
見故以相示雖無足味聊復為笑耳其重昶如是又為

都督大將軍特給班劍二十人太和二十一年四月卒
於彭城孝文為之舉哀給溫明祕器錢百萬布五百疋
蠟三百斤朝服一具衣一襲贈假黃鉞太傅領揚州刺
史加以殊禮九錫給前後部羽葆鼓吹依晉琅邪武王
伯故事

楊播為龍驤將軍與陽平王順等出漠北擊蠕蠕大獲
而還孝文嘉其勲賜奴婢十口遷武衛將軍復擊蠕蠕
至居然山而還除左將軍尋假前將軍隨車駕南討擁

衆濟淮孝文甚壯之賜爵華陰子尋除右衛將軍後隨
駕討崔惠景於鄧城破之進號平東將軍

呂羅漢為羽林郎初太武時上邽休官呂豐屠各王飛
廉等為逆羅漢頻破賊軍以功遷羽林中郎幢將加建
威將軍後為秦益二州刺史大破仇池氐羌孝文詔曰
其所得口馬便勅領納其馬付都牧口以賜卿

陸叡為北部長孝文太和八年正月叡與隴西公元琛
竝持節為東西二道大使褒善罰惡聲聞京師五月詔

賜叡夏服一具後以叡為北征都督擊蠕蠕大破之遷
侍中都曹尚書時蠕蠕又犯塞詔率騎五千以討之蠕
蠕遁走擒其帥赤河突加散騎常侍又為使持節鎮北
大將軍與陽平王頤竝為都督領軍將軍斛律桓等北
征三道諸軍事步騎十萬以討蠕蠕叡以下各賜衣物
布帛孝文親幸城北訓誓羣帥除尚書令衛將軍大破
蠕蠕而還

薛肅為都將討秦州反賊支酋生擒斬之除立忠將軍

王仲興為折衝將軍屯騎校尉又命率千餘騎破賊於鄧城除振威將軍越騎校尉賜帛千疋

李佐假平遠將軍統軍時梁新野太守劉忌憑城固守佐率所領攻拔之以功封涇陽縣開國子邑三百戶

宇文福為南征都將孝文時擊齊有功授顯武將軍尋除恢武將軍北征都將特賜戎服破蠕蠕別部斬獲萬餘還除都牧給事及孝文南征詔福與右衛將軍楊播為前軍擊齊軍大奔賜爵昌黎伯宣武景明初為平遠

將軍進計於都督彭城王勰遂令福攻建安建安降以
勲封襄樂縣開國男食邑三百戶

源懷宣武時為車騎大將軍正始元年蠕蠕南寇常代
詔懷以本官加使持節前出據北蕃賜馬一匹細鎧一
具御稍一枚懷至雲中蠕蠕亡遁又武興氏王楊紹先
叔集起反叛詔懷使持節侍中都督平氏諸軍事以討
之三年六月卒詔給東園祕器一具衣一襲錢二十萬
布七百疋蠟三百斤贈司徒

長孫稚為鎮西將軍討蜀都督頻戰有功除平東將軍
蕭寶夔除使持節督東揚南徐兗三州諸軍事鎮東將
軍揚州刺史丹陽郡開國公齊王配兵一萬令且據東
城乃備禮策授賜車馬什物給虎賁五百人事從豐厚
及壽春之戰勇冠諸軍既還京師改封梁郡開國公食
邑八百戶

薛真度自孝文時為假節冠軍將軍真度每獻計於孝
文勸先取樊鄧後攻南陽故為孝文所賞賜帛一百疋

又加持節正號冠軍改封臨晉縣開國公食邑三百戶
至宣武時除平南將軍揚州刺史又以年老聽子懷吉
以本官隨行梁豫州刺史王超宗率衆圍逼小峴真度
遣兼統軍李叔仁等率步騎擊破之還朝除金紫光祿
大夫加散騎常侍又改封敷西縣永平中卒賻帛四百
疋朝服一襲贈左光祿大夫

畢祖朽為寧朔將軍時梁將蕭及等寇兗州祖朽擊討
之以功封南城縣開國男食邑二百戶

畢祖暉為平西將軍幽州刺史孝明正光五年州民反
招引隴賊攻逼祖暉以全城之勲封新昌縣開國子食
邑四百戶

楊大眼為統軍從孝文征宛葉穰鄧九江鍾離之間勇
冠六軍宣武初裴叔業以壽春內附大眼率衆先入以
功封安成縣開國子食邑三百戶除直閣將軍尋加輔
國將軍游擊將軍出為征虜將軍荊州刺史

崔延伯為鎮南將軍行岐州刺史假征西將軍賜驛騶

一匹孝明正光五年秋以往在揚州建淮橋之勲封當利縣開國男食邑二百戶尋增邑一百戶改封新豐進爵為子

田益宗為征虜將軍遣戍主奇道顯擊楊僧遠軍破之進號平南將軍宣武又詔益宗綏防蠻楚加安南將軍增封一百戶賜帛二千疋

王肅為平南將軍肅至義陽頻破齊軍降者萬餘孝文遣散騎侍郎勞之以功進號平南將軍賜駿馬一匹除

持節都督豫東豫鄆三州諸軍事又以破齊將裴叔業
功進號鎮南將軍加都督豫南兗東荆東豫四州諸軍
事封汝南縣開國子食邑三百戶加鼓吹一部宣武時
拜使持節都督江東諸軍事車騎將軍肅進師討擊齊
軍於死虎大破之肅還京師宣武臨東堂引見勞之以
肅淮南累捷賞帛四千七百五十疋進位開府儀同三
司封昌國縣開國侯食邑八百戶尋以肅為散騎常侍
都督淮南諸軍事揚州刺史景明二年薨於壽春宣武

為舉哀詔曰肅奄至不救痛惋兼懷可遣中書侍郎賈思伯兼通直散騎常侍撫慰厥孤給東園秘器朝服一襲錢三十萬帛一千疋布五百疋蠟三百斤竝問其卜遷遠近尋遣侍御史一人監護喪事務令優厚又詔曰死生動靜卑高有域勝達所居存亡崇顯故杜預之歿窆於首陽司空李冲覆舟是託顧瞻斯所誠亦二代之九原也肅誠義結於二世英惠符於李杜平生本意願終京陵既有宿心宜遂先志其令塋于冲預兩墳之間

使之神游相得也贈侍中司空本官如故孝明初詔為
肅建碑銘

邢巒為安東將軍豫州城民白早生殺刺史司馬悅以
城南入梁詔巒持節率羽林精騎以討之封平舒縣開
國伯食邑五百戶賞宿豫之功也又詔加巒使持節假
鎮南將軍都督南討諸軍事征南將軍既平豫州振旅
還京師宣武臨東堂勞之遷殿中尚書加撫軍將軍延
昌三年暴卒詔賻帛四百疋朝服一襲贈車騎大將軍

瀛州刺史

李平為使持節都督北討諸軍事鎮北將軍行冀州事
時京兆王愉反于信都故宣武詔平討之臨武乾殿勞
遣平既擒愉冀州平宣武遣兼給事黃門侍郎祕書丞
元梵宣旨慰勞又梁遣其左游擊將軍趙祖悅偷據西
碇石衆至數萬以逼壽春宣武詔平為鎮東大將軍討
之又詔平長子獎以通直郎從賜平縑錦百段紫納金
裝衫甲一領賜獎縑布六十段絳衲襖一領父子重列

拜受家庭觀者榮之及平破梁軍斬祖悅送首于雒以
功遷尚書右僕射加散騎常侍將軍如故

李虔為長樂太守延昌初冀州大乘賊起令虔以本官
為別將與都督元遙討平之遷後將軍後又追論平冀
州之功賜爵高平男

崔敬邕為左中郎將隨中山王英南討以功賜爵臨淄
男

李順為前將軍從太武攻統萬赫連昌昌出逆戰順督

勒士衆破其左軍及克統萬至京論功以順為給事黃門侍郎賜奴婢十五戶帛千疋

李憲為七兵尚書撫軍將軍孝昌初元法僧據徐州反叛詔憲為使持節假鎮東將軍徐州都督與安豐王延明臨淮王彧等討之會梁武遣其豫章王綜據彭城俄而綜降徐州既平詔遣兼黃門侍郎常景詣軍慰勞賜憲驊騮馬一匹仍除征東將軍揚州刺史淮南大都督董紹為平西將軍孝明以紹拒蕭寶寅之功賞新蔡縣

開國男食邑二百戶

崔孝芬孝明時為龍驤將軍時荊州刺史李神儁為梁
遣將軍攻圍詔孝芬為刺史以代神儁乃遣弟孝直輕
兵在前出賊不意賊便奔散人還安堵孝明嘉勞之并
賚馬及棉絹等物

伊益生為統軍累有戰功為名將以勲賜爵平城子孝
明神龜中為右將軍後除安西將軍每戰克捷進號征
西將軍

崔模為別將及蕭寶寅討闕隴引模為征西別將屢有戰功詔除持節光祿大夫都督別道諸軍事加安東將軍萬俟醜奴遣將郝虎南侵模攻破其營擒虎以功封槐里縣開國伯食邑五百戶

楊津為撫軍將軍出據靈邛而賊帥鮮于修禮起於博陵定州危急遂迴師南赴至城下營壘未立而州軍新敗津以士衆勞疲移軍入城其後賊攻州城津出戰斬賊帥詔除衛尉卿既而杜雒周圍州城津盡力捍守詔

加衛將軍封開國縣侯食邑一千戶

崔元珍為平陽太守以頻破胡賊郡內以安孝明武泰初改郡為唐州仍除元珍為刺史加右將軍以破胡勲賜爵涼城侯

宇文延以孝明孝昌中授假節建威將軍西道別將赴援關隴有戰功除員外散騎常侍

李崇自孝文時為都督隴右諸軍事擊氏楊靈珍從弟建軍於龍門破之靈珍走奔漢中孝文在南陽覽表大

悅曰使朕無西顧之憂者李崇之功也以崇為都督梁秦二州諸軍事孝明時累遷左衛將軍追賞平氏之功封魏昌縣開國伯食邑五百戶

李神為衛將軍行相州刺史時葛榮兵充斥民多逃散神撫勞兵民小大用命會爾朱榮擒葛榮於鄴西事平除車騎將軍以功進爵為公增邑八百戶通前一千戶裴衍為征虜將軍梁遣將曹敬宗寇荊州詔衍為別將假前將軍解荊州圍除使持節散騎常侍平東將軍假

安東將軍北道都督鎮鄴西之武城封安陽縣開國子
邑三百戶時相州刺史安樂王鑒叛逆詔行討平之除
撫軍將軍相州刺史假鎮北將軍北道大都督進封臨
汝縣開國公增邑千二百戶

爾朱天光為鎮東將軍時元顥入雒并肆不安天光至
并州部分約勒所在寧輯顥破尋還京師遷驃騎將軍
加散騎常侍改封廣宗郡公增邑一千戶

陸希質為龍驤將軍膠州刺史時梁將侵州界希質討

破之轉建州刺史

李神雋自宣武時為前將軍荊州刺史時梁將曹景宗來寇攻圍積時神雋戮力固守至莊帝時追論固守荊州之功封千乘縣開國侯食邑一千戶

楊侃為右將軍岐州刺史時元顥內逼莊帝詔以本官假撫軍將軍為都督率衆鎮大梁未發詔行北中郎將帝至建州叙行從功臣自陽城王徽以下凡十人竝增三階以侃河梁之誠特加四階侃固辭祈同諸人久乃

見許於是除鎮軍將軍度支尚書兼給事黃門侍郎敷
西縣開國公食邑一千戶又南渡破元顥子領軍將軍
冠受擒之顥便南走車駕入都侃解尚書正黃門加征
東將軍金紫光祿大夫以濟河之功進爵濟北郡開國
公增邑五百戶

辛纂為征虜將軍兼尚書仍行臺後大都督費穆擊梁
將曹義宗擒之入朝言於莊帝稱纂固節危城宜蒙爵
賞以勸將來帝乃下詔慰勉之尋除持節平東將軍中

郎將賜絹五十疋金裝刀一口

張煇為冠軍將軍中散大夫後為別將隨長孫雄西征
轉平西將軍大中大夫為關西都督以功封長平縣開
國男食邑二百戶

斛斯椿為平北將軍從大將軍爾朱榮平葛榮以功除
上黨太守

賀拔勝宣武時為驃騎大將軍攻拔梁下羌戍使人誘
勸諸蠻皆率其種落歸款漢南大駭馮翊安定沔陽竝

平之進位尚書令進爵琅琊公又為撫軍將軍大都督
出井陘鎮中山元顥入雒勝與爾朱兆破擒顥息冠受
及其都督陳思保莊帝還宮以功增邑六百戶

賀拔岳為車騎將軍隸爾朱天光為左廂大都督討万
俟醜奴擒蕭寶夤王慶雲天光雖為元帥而岳効居多
加車騎將軍增邑二千戶進封樊城縣開國伯又孝莊
時為衛將軍左都督大破赤水蜀賊軍威大振時万俟
醜奴自率大衆圍岐州岳擊退之遂擒醜奴三秦河渭

瓜涼鄯州咸來歸款岳功多進封清水郡公尋加侍中
給後部鼓吹進位開府雍州刺史

侯莫陳悅為征西將軍爾朱天光之討關西以悅為右
廂大都督西伐克獲皆與天光賀拔岳畧同勞効除鄯
州刺史

侯淵為中軍副都督常從征伐屢有戰功孝莊即位領
左右封厭次縣開國子食邑四百戶後從爾朱榮討葛
榮於滄口戰功尤多榮啟淵為驃騎將軍燕州刺史淵

又進討韓樓追擒之以勲進爵為侯增邑八百戶

樊子鵠為平北將軍莊帝永安中以招納叛蜀數萬口
進封中都縣開國公通前邑千戶元顥入雒薛修義及
降蜀陳雙熾等受顥處分率眾攻州城子鵠出與戰大
破之以功拜撫軍將軍尋徵授西荊州大中正後兼右
僕射為行臺督賈智等討呂文欣於東徐州平之還除
車騎將軍左光祿大夫進封南陽郡開國公增邑六百
戶又假驃騎大將軍都督二豫州郢三州諸軍事兼尚

書右僕射子鵠到相州又勅賚絹五百疋及趙脩延叛
為荊州詔子鵠通三鷓道而還遭母憂去職前廢帝聞
其在雒無宅凶費不周賚絹四百疋粟五百石

源子恭初自孝明正光中為冠軍將軍時秦益氏反詔
子恭持節為都督河間王琛軍司馬討之事平仍行南
秦州事及六鎮反以子恭兼給事黃門郎持節慰勞還
拜河內太守加後將軍平絳蜀反丹谷清廉二路險溢
不通以子恭為當郡別將俄而建興蜀復反相與連勢

進子恭為持節散騎常侍假平北將軍加建興都督仍
兼尚書行臺與正平都督長孫稚合勢進討大破之事
平除平南將軍豫州刺史尋加散騎常侍撫軍太武初
郢州刺史元顯達以城降梁詔子恭擊退梁將夏侯夔
及夏侯亶等衆加鎮南將軍又兼尚書行臺擊斬梁軍
主胡智達等及元顯入雒也加子恭車騎將軍未幾顯
敗莊帝還進征南將軍兼右僕射假車騎將軍後加散
騎常侍右光祿大夫給事黃門侍郎仍本將軍錄其前

後征討功封臨潁縣開國侯食邑六百戶出帝永熙中入為吏部尚書加驃騎大將軍以子恭在前豫州戰功追賞襄城縣開國男食邑二百戶

源子雍為散騎常侍使持節假撫軍將軍都督兼行臺尚書破賊帥紇單步胡提於曲沃堡孝明璽書勞勉之子雍在白水郡復破阿非軍於白水郡多所斬獲詔遣使勞勉除中軍將軍金紫光祿大夫給事中黃門郎封樂平縣開國公食邑一千戶還雒以葛榮久逼信都詔

假子雍征北將軍為北討都督時相州刺史安樂王鑒據鄴反勅子雍與都督李神軌討平之改封陽平縣開國公增邑千五百戶進號鎮東將軍

甄密孝明末為冠軍將軍時賊帥葛榮侵擾河北裴衍源子雍敗没人情不安詔密為相州行臺援守鄴城莊帝以密全鄴之勲賞安市縣開國子食邑三百戶

鄭先護孝莊時為前將軍廣州刺史後元顥入雒先護據州起義不受顥命出城拒戰莊帝還京嘉其誠節除

使持節散騎常侍都督襄廣二州諸軍事鎮南將軍刺
史如故進爵郡公

費穆為輔國將軍孝明孝昌中二絳蜀叛以穆為都督
討平之拜前將軍散騎常侍遷平南將軍光祿大夫又
兼武衛將軍討破妖賊李洪於關口之南遷金紫光祿
大夫正武衛將軍爾朱榮入雒莊帝詔穆為使持節征
南將軍都督南征諸軍事生擒梁將曹義宗以功遷衛
將軍進封趙平郡開國公增邑一千戶

爾朱榮為冠軍將軍時乞步落堅胡劉阿如等作亂瓜肆勅勒北列步若反于沃陽榮竝滅之以功封安樂縣開國侯食邑一千戶

爾朱兆為車騎將軍元顥之屯於河橋兆進破安豐王延明顥於是退走莊帝還宮論功除散騎常侍車騎大將軍儀同三司增邑八百戶為汾州刺史復增邑千戶尋加侍中驃騎大將軍又增邑五百戶

冊府元龜卷三百八十二

欽定四庫全書

冊府元龜卷三百八十二 宋 王欽若等 撰

將帥部

褒異第八

北齊庫狄干初為後魏雲中刺史後從神武起兵破四胡於韓陵封廣平縣公

堯雄後魏孝莊時為宣威將軍從叱列延討劉靈助平之拜鎮東將軍燕州刺史封平城縣伯食邑五百戶

高昂後魏廢帝時為使持節冀州刺史隨神武討爾朱
兆大敗之尋拜侍中開府進爵為侯食邑七百戶

高季式東魏孝靜時為侍中都督從河清公岳破蕭明
於寒山敗侯景於渦陽除衛尉卿復為都督從清河公
攻王思政於潁川拔之以前後功加儀同三司文宣天
保初封乘氏縣子

庫狄盛為伏波將軍每從神武征討以功封行唐縣伯
累遷特進卒贈使持節都督朔瀛趙幽安五州諸軍事

太尉朔州刺史

薛孤延為征虜將軍永固侯隸神武為都督從破爾朱
兆於廣阿因從平鄴以功進爵為公累遷恒州刺史從
破周軍於印山進爵為縣公封千戶又從討破山胡西
攻玉壁入為左衛將軍改封平秦郡公

韓軌為鎮城都督從神武破爾朱兆於廣阿封平昌縣
侯仍督中軍從破爾朱兆於赤碭嶺再遷秦州刺史頻
以軍功進封安德郡公後拜大司馬從文宣征蠕蠕在

軍暴薨贈假黃鉞太宰太師

高市貴為晉州刺史從神武破紇豆陵於并州有功除
驃騎大將軍儀同三司封常山郡公邑一千五百戶又
隨大都督婁昭討平樊子鵠除西兗州刺史

潘樂初隨後魏爾朱榮為別將討元顥以功封敷城縣
男神武出牧晉州引樂為鎮城都將從破爾朱兆於廣
阿進爵廣宗縣伯累以軍功拜雍州刺史

段榮為鎮北將軍定州刺史時神武攻鄴未尅榮轉輸

軍資無闕神武入雒論功封姑臧縣侯邑八百戶轉瀛州刺史後除山東大行臺大都督及卒贈使持節定冀滄瀛四州諸軍事定州刺史太尉尚書左僕射

克傑為給事中羽林監從神武破紇豆陵步藩有功除鎮東將軍封樂城縣伯邑百戶出為滄州刺史又從神武平鄴及破爾朱兆進爵為都督隨樊子鵠討元樹平之除南兗州刺史

蔡雋為平遠將軍帳內別將從神武破葛榮除諫議大

夫又從平元顥封烏碯縣男

尉長命為安南將軍樊子鵠據兗州反除東南道大都督與諸軍討平之轉鎮范陽城就拜幽州刺史督安平

二州事

王懷為大都督從神武討爾朱兆於廣阿破之除安北將軍蔚州刺史

莫多婁貸文為武賁中郎將虞侯大都督從神武擊爾朱兆於廣阿有功加前將軍封石城縣子邑三百戶又

從破四胡於韓陵進爵為侯後除晉州刺史汾州胡賊
為寇竊高祖往討馬以貸文為前鋒每有戰功還賚奴
婢三十人牛馬各五十布一千疋仍為汾陝東雍晉秦
五州大都督

可朱渾元為車騎大將軍討西魏儀同金祚皇甫智達
於東雍擒之遷并州刺史又與諸將征伐數有尅捷降
下天保初封扶風郡王頻從文宣討山胡茹茹累有戰
功累遷太師薨贈假黃鉞太宰錄尚書

劉豐為汾州刺史與諸將征討平定寇亂又從神武破周文於河陰豐功居多神武執其手嗟賞之入為左衛將軍

破六韓常為撫軍與諸將征討又從神武擊諸寇累遷車騎大將軍開府封平陽公除洛州刺史

金祚為車騎將軍邛山之戰以大都督從神武破西軍除華州刺史文宣受禪加開府儀同三司別封臨濟縣子

叱列平為武衛將軍隨爾朱榮破葛榮平元顥遷中軍
都督右衛將軍封癭陶縣伯邑七百戶後為東郡大行
臺從神武平爾朱兆又從領軍婁昭討樊子鵠平之授
使持節華州刺史

步大汗薩為揚武將軍從爾朱榮討平葛榮累功加鎮
南將軍

堯奮為中堅將軍安夷縣子從神武平鄴破爾朱兆等
進爵為伯出為南汾州刺史破西魏行臺薛崇禮衆轉

驃騎將軍左光祿大夫潁州刺史卒贈兗豫梁三州諸
軍事司空兗州刺史

張保雒為奉事都尉隸神武為都督從討步蕃又為帳
內從討爾朱兆於廣阿遷右將軍中散大夫又從圍鄴
城既拔除平南將軍光祿大夫從破爾朱兆等於韓陵
因隨神武入雒加安東將軍封平昌縣薄家城鄉男邑
一百戶

封延之神武以為大行臺左光祿大夫以都督從婁昭

討樊子鵠事平除青州刺史

李景遺為龍驤將軍力戰爾朱兆有功除使持節大都督左將軍進爵昌平郡公增邑三百

盧勇行雒州事時官軍圍廣州數旬未拔勇率騎擒西魏儀同程華降廣州守將雒超神武以勇行廣州事授儀同三司揚州刺史卒贈司空贈物之外別賜布絹四千疋

斛律金後魏孝莊時為寧朔將軍屯騎校尉從破葛榮

元顥頻有戰功加鎮南大將軍神武南攻鄴留金守信
都別討李脩破之加右光祿大夫會神武於鄴仍從平
晉陽追滅爾朱兆以金為汾州刺史大都督進爵為侯
及周文帝入雒陽神武使金統劉豐步大汗薩等步騎
數萬守河陽城以拒之神武到仍從破密軍還除大司
馬改封石城郡公邑一千戶轉第一領民酋長文襄時
為肆州刺史西魏九曲戍將馬紹隆據險要關金破之
以功別封安平縣男文宣受禪封咸陽郡王刺史如故

天保元年冬朝晉陽宮金病帝幸其宅臨視賜以醫藥
中使不絕病愈還州三年就除太師帝征奚賊金亦從
行軍還帝幸肆州與金宴射而去四年解州以太師還
晉陽車駕復幸其第六宮及諸王盡從置酒作樂極夜
方罷遷左丞相又詔金朝見聽乘步挽車至階武成登
極禮遇彌重及卒武成舉哀西堂後主又舉哀於晉陽
宮賜假黃鉞使持節都督朔定冀并瀛青齊滄幽肆晉
汾十二州諸軍事相國太尉公錄尚書朔州刺史

宋顯為神武行臺右丞樊子鵠據兗州反前西兗州刺史乙瑗等屯據五梁以應子鵠神武以顯行西兗州事率衆討破之拜西兗州刺史

慕容紹宗為西南道軍司討破宜陽叛民李延孫軍還行揚州刺史尋行豫州刺史時西魏將獨孤如願據雒州神武命紹宗率兵赴武牢平之進爵為公

薛循義為衛將軍行晉州事西魏儀同長孫子彥圍逼城下循義開門伏甲以待於是遁去神武嘉之就拜晉

州刺史南汾東雍陝四州行臺賞帛千疋後為衛尉卿
時山胡侵亂晉州遣循義追討破之進爵正平郡公加

開府

綦連猛為征虜將軍中散大夫東魏孝靜元象元年從
神武向河陽與周文帝戰於印山二年除平東將軍中
散大夫其年又轉中外府帳內都督賞印山之功封廣
興開國公文宣天保九年除都督東秦州刺史隨斛律
敦北征茹茹大破之賚帛三百段

杜弼為衛尉卿會梁遣涇陽侯蕭淵明等入寇彭城大都督高岳行臺慕容紹宗率軍討之詔弼為軍司攝行臺左丞臨發文襄賜胡馬一匹語弼曰此廐中第二馬孤常自乘騎今方遠別聊以為賜

庫狄迴雒後魏莊帝時為別將從神武破四胡於韓陵以軍功補都督加後將軍大中大夫封順陽縣子邑四百戶遷左廂都督征山胡先鋒斬級除朔州刺史破周文於河陽轉授夏州刺史岵山之役力戰有功增邑通

前七百戶文襄嗣事從平潁川文宣天保初除建州刺史

元景安為都督領親信都督印山之役力戰有功賜爵西華縣都鄉男天保三年加征西將軍從破庫莫奚於代州轉領左右大都督四年從討契丹於黃龍領北平太守後頻從駕再破茹茹遷武衛大將軍又轉領左右大將軍兼七兵尚書

獨孤永業為行臺尚書時周人逼雒每為先鋒以寡敵

衆周人憚之加儀同三司賞賜甚厚

暴顯為衛大將軍文宣時與高岳南臨漢水攻下梁西楚州師還加開府儀同三司賞帛五百疋

盧潛孝昭時為揚州道行臺左丞時陳秦雍二州刺史王奉國合州刺史周令珍前後入寇潛輒破平之以功加散騎常侍食彭城郡轉遷合州刺史

段韶自神武建義初領親信都督攻劉誕於鄴及韓之戰韶督率所部先鋒陷陣尋從神武出晉陽追爾朱兆

於赤嶺嶺平之以軍功封下洛縣男又從襲取夏州擒
斛律彌娥突加龍驤將軍諫議大夫神武為西魏將賀
拔勝軍所逼韶引弓反射斃其前驅西魏軍退賜馬并
金進爵為公及文襄還鄴韶留守晉陽文襄還賜女樂
十數人金十斤繒帛稱是封長樂郡公文宣天保中梁
將東方白額潛至宿豫招誘邊民殺害長吏淮泗擾動
詔韶討之江淮帖然文宣嘉其功詔賞吳口七十人封
平原郡王武成大寧二年除并州刺史高歸彥作亂冀

州詔韶與東安王婁叡率衆討平之遷太傅賜女樂十人并歸彥果園一千畝是年十二月周文帝遣將率羗夷與突厥合衆逼晉陽韶戰大破之武成嘉其功別封懷州武德郡公進位太師後主武平二年二月周師來寇遣韶與右丞相斛律光太尉蘭陵王長恭同往捍禦軍還以功別封樂陵郡公竟以疾薨帝舉哀東堂賜物千段温明祕器輜輶車軍校之士陳衛送至平恩墓所發卒起冢贈假黃鉞使持節都督朔并定趙冀滄齊充

梁雒晉建十二州諸軍事相國太尉錄尚書事朔州刺史

史
慕容儼後魏孝明時為河間王元琛左廂軍主率衆救
壽春以功賜帛五十疋累遷安東將軍高梁太守轉五
城太守東雍州刺史沙苑之敗西魏荊州刺史郭鸞率
衆攻儼拒守二百餘日晝夜力戰大破鸞軍追斬三百
餘級又擒西魏荊州刺史郭他時諸州多有翻陷唯儼
獲全進號鎮南將軍又從神武攻玉壁賜帛七百疋并

衣帽等文宣天保初為開府儀同三司鎮郢州城大破
梁軍除趙州刺史進爵為公賜帛一千疋錢十萬至孝
昭皇建初別封成陽郡公後主天統四年又別封猗氏
縣公并賜金銀酒鍾各一枚胡馬一匹

皮景和後主武平中為領軍將軍陳將吳明徹圍壽陽
勅令景和與賀拔伏恩等赴救景和以尉破胡軍始喪
敗怯懦而不敢進頓兵淮口頻有勅使催促然始渡淮
屬壽陽已陷狼狽北還器械軍資大致遺失陳將蕭摩

訶率步騎於淮北倉陵城截之景和得士卒整旅逆戰
摩訶退歸是時拒吳明徹者多致傾覆唯景和全軍而
還繇是獲賞除尚書令別封西河郡開國公賜錢二十
萬酒米十車

斛律光為左衛將軍天保三年從文宣出塞光先驅破
敵還除晉州刺史九年又率衆取周絳州白馬澮文翼
城等四戍除朔州刺史武成河清三年冬周遣其柱國
大司馬尉遲迴等寇洛陽光率騎五萬擊敗之文成幸

洛陽策勲班賞遷太尉又封冠軍縣公後主武平二年
光大破周柱國韋孝寬等軍於平隴封中山郡公增邑
千戶

周長孫澄為征東將軍從太祖戰印山進位驃騎大將軍
開府孝閔踐阼拜大將軍封義門公為玉壁總管卒自
喪初至及葬明帝三臨之典祀中大夫宇文容諫曰君
臨臣喪自有節制今乘輿屢降恐乖禮典帝不從

侯莫陳順為衛尉卿從太祖征討拜大都督西魏東討

順與太尉王盟僕射周惠達等留鎮長安時趙青雀反
盟及惠達等奉魏太子出次渭北順於渭橋與賊戰頻
破之賊不敢出魏文帝還執順手曰河橋之戰卿有殊
力便解所服金鏤玉帶賜之

李弼為秦州刺史從太祖平竇泰先鋒陷敵太祖以所
乘騅馬賜之及泰所著牟甲亦賜之又從平弘農與齊
神武戰於沙苑大破之以功拜特進爵趙郡公

子謹為關內大都督從太祖征潼關破迴雒城授北雍

州刺史進爵藍田縣公後為柱國大將軍率衆出討江陵太祖餞於青泥谷及立梁宣帝振旅而還太祖親至其第宴語極歡賞謹奴婢一千口及梁寶物并金石絲竹樂一部

趙貴為車騎大將軍從太祖復弘農戰沙苑拜侍中驃騎大將軍開府又從戰河橋及援玉壁又從戰印山拜柱國大將軍

獨孤信後魏孝文帝時為武衛將軍孝武西遷單騎及之

於澀澗孝武嘆曰武衛遂能辭父母捐妻子遠來從我
世亂識忠良豈虛言哉即賜御馬一匹進爵浮陽郡公
時荊州雖陷東魏人猶戀本朝乃以信兼尚書右僕射
東南道行臺荊州刺史以招懷之信遂大破東魏將又
破諸蠻三荆遂定就拜車騎大將軍

侯莫陳崇為驃騎大將軍開府從擒竇泰復弘農破沙
苑從戰河橋崇功多進位柱國

若干惠為中堅將軍從賀拔岳西征定隴右惠每力戰

有功累遷征西將軍魏孝武西遷除右衛將軍從擒竇泰復弘農破沙苑惠每先登陷陣加開府進爵長樂郡公又從太祖戰印山太祖壯之遷司空

怡峯為征虜將軍從太祖平隴右破竇泰復弘農破沙苑又與諸將征討每皆尅捷威名大振累遷車騎大將軍開府夏州刺史

劉亮以都督從賀拔岳西征常先鋒陷陣以功拜大都督及太祖置十二軍簡諸將以將之亮領一軍每征討

為騎將以迎魏武功遷左大都督從擒竇泰復弘農與
沙苑之役並力戰有功遷車騎大將軍開府封長廣郡
公亮以勇敢見知為當時名將兼屢陳謀策多合機宜
太祖謂曰卿文武兼資即孤之孔明也出為東雍州刺
史卒於州喪還京文帝親臨之泣而謂人曰股肱喪矣
腹心何寄令鴻臚卿監護喪事追贈太尉

豆盧寧為別將封河陽縣伯常從太祖征討又與諸將
破平諸寇累遷大司寇進封楚國公邑萬戶

楊忠為征西將軍河橋之役忠力戰守橋敵人不得進
印山之戰又先登陷陣除侍中驃騎大將軍開府

王盟為積射將軍隨賀拔岳為先鋒擒万俟醜奴平秦
隴常先登力戰拜征西將軍平秦郡守太祖討侯莫陳
悅以盟為留後大都督鎮高平悅平除原州刺史趙青
雀之亂以節度關中諸軍出頓渭北事平進爵長樂郡
公增邑並前二千戶

賀蘭祥為都督從平侯莫陳悅又迎魏孝武以前後功

封撫夷縣伯邑五百戶仍從擊潼關獲東魏將薛長儒
又攻迴雒城拔之還拜左右直長進爵為公增邑並前
一千三百戶西魏文帝大統三年又從于謹攻楊氏壁
祥先登克之遷右衛將軍加持節征虜將軍沙苑之役
詔祥留衛京師後以留守功贈邑八百戶尋除鎮西大
將軍四年文帝東伐祥以領軍從戰河橋以功加使持
節大都督八年遷車騎大將軍儀同三司散騎常侍九
年從太祖與東魏戰於卬山進位驃騎大將軍開府儀

同三司加侍中

尉遲綱西魏文帝時為殿中將軍大統元年授帳內都督討曹泥破之又從破竇泰以功封廣宗縣伯邑五百戶仍從復弘農克河北郡戰沙苑皆有功河橋之戰綱與李穆等從太祖力戰以前後功增邑八百戶進爵為公仍拜平遠將軍步兵校尉

叱列伏龜後魏孝明時為別將從長孫稚西征以戰功累遷征西將軍金紫光祿大夫後還稚授都督後從太

祖征討亟有戰功西魏文帝大統八年出為北雍州刺史加大都督尋進位驃騎大將軍儀同三司散騎常侍閻慶為中堅將軍奉車都尉河橋之役以功拜前將軍大中大夫遷後將軍封安次縣子邑四百戶及印山之戰先登陷陣拜撫軍將軍大都督進爵為伯增邑五百戶

達奚武為東秦州刺史齊神武趣沙苑太祖遣武覘之具知敵之情狀以告太祖太祖深嘉焉遂破之進爵高

陽公拜車騎大將軍太祖援洛陽武力戰斬其司徒高
敖曹遷侍中驃騎大將軍開府後遷上柱國

王謙為柱國大將軍討吐谷渾力戰有功是時高祖東
征謙又力戰進上柱國益州總管

蔡祐為都督從太祖討侯莫陳悅破之又從迎西魏孝
武於潼關以前後功封長鄉縣伯邑五百戶魏文帝大
統初加寧朔將軍羽林監尋持節員外散騎常侍進爵
為侯增邑一千一百戶從太祖擒竇泰復弘農戰沙苑

皆有功授平東將軍大中大夫魏恭帝二年為兵部中大夫江陵初附諸蠻騷動詔祐與大將軍豆盧寧討平之三年拜大將軍給後部鼓吹以前後功增邑並前四千戶

常善為龍驤將軍從太祖平侯莫陳悅除天水郡守魏孝武西遷授武衛將軍進爵武始縣伯增邑二百戶魏文帝大統初加平東將軍進爵為侯擒竇泰復弘農破沙苑累有戰功除使持節衛將軍假驃騎大將軍秦州

刺史四年從戰河橋加大都督進爵為公除涇州刺史屬茹茹入寇抄掠北邊善率所部破之拜車騎大將軍儀同三司

辛威為羽林監從太祖迎魏孝武因攻迴雒城功居最魏文帝大統元年拜寧遠將軍增邑二百戶累遷通直散騎常侍進爵為侯增邑三百戶從擒竇泰復弘農戰沙苑並先鋒陷敵勇冠一時以前功授撫軍將軍銀青光祿大夫從于謹破襄城又從獨孤信入雒陽經河橋

陣加持節進爵為公增邑八百戶

李賢為宣威將軍時賀拔岳為侯莫陳悅所害太祖西
征賢與其弟遠穆等密應侯莫陳崇以功授都督仍守
原州及大將軍至秦州悅棄城走太祖以賢為前驅轉
戰悅自到於陣太祖嘉之賞奴婢布帛及雜畜等授持
節撫軍大將軍都督魏孝武西遷太祖令賢率騎士迎
衛時山東人衆多欲逃歸帝乃令賢以精騎三百為殿
衆皆憚之莫敢亡叛封下邳縣公邑一千戶俄授左都

督安東將軍還鎮原州西魏文帝大統三年州民豆盧
狼害都督大野樹兒等據州城反賢一戰而敗之遷原
州刺史尋行原州事四年莫折後熾連結賊黨所在寇
掠賊大敗師還以功賞奴婢四十口雜畜數百頭八年
授原州刺史十二年隨獨孤信征涼州平之又撫慰張
掖等五郡而還俄而茹茹圍逼州城賢追擊捕獲不可
勝計人得安堵加授使持節車騎大將軍儀同三司遷
驃騎大將軍開府儀同三司太祖之奉魏太子西巡也

至原州遂幸賢第讓齒而坐行鄉飲酒禮焉其後太祖
又至原州令賢乘輅備儀服以諸侯會遇禮相見然後
幸賢第歡宴終日凡是親族頒賜有差

李遠為征東大將軍從征寶泰復弘農並有殊勲授都
督原州刺史沙苑之役遠功居多除車騎大將軍儀同
三司進爵陽平郡公邑三千戶

赫連達為都將從太祖平侯莫陳悅加平東將軍仍賜
馬二百匹魏孝武入關褒叙勲義以達首迎元帥匡復

秦隴進爵魏昌縣伯邑五百戶又破曹泥除鎮南將軍
金紫光祿大夫加通直散騎常侍增邑并前一千戶從
復弘農戰沙苑皆有功又增邑八百戶除白水郡守轉
帥都督加持節除濟州刺史以達勲望兼隆乃除雲州
刺史即本州也進爵為公拜大都督

韓果為宣威將軍從太祖討平侯莫陳悅遷都督賜爵
邯鄲縣男西魏孝武入關進封石城縣伯邑五百戶文
帝大統初進爵為公增邑通前一千戶加通直散騎常

侍從太祖襲竇泰於潼關太祖依其規畫軍以勝返賞
眞珠金帶一胷帛二百疋授征虜將軍又從復弘農攻
拔河南城獲守一人論功為最破沙苑戰河橋並有功
授撫軍將軍銀青光祿大夫增邑九百戶

庫狄昌為衛將軍右光祿大夫從太祖迎後魏孝武復
潼關封長樂縣子邑八百戶西魏文帝大統初進爵為
公增邑一千戶從破竇泰授車騎將軍左光祿大夫又
從復弘農戰沙苑皆先登陷陣太祖嘉之授帥都督四

年從戰河橋除冀州刺史後與于謹破胡賊劉平伏於
上郡授馮翊郡守久之轉河北郡守十三年錄前後功
授大都督通直散騎常侍又從隋公楊忠破蠻賊田社
清昌功為最增邑三百戶拜儀同三司

田弘為都督從太祖復弘農戰沙苑解洛陽圍破河橋
陣弘功居多累蒙殊賞尋授原州刺史太祖在同州文
武並集乃謂之曰人人如弘盡心天下豈不早定即授
車騎大將軍儀同三司武帝天和為大將軍拔宜陽

等九城以功增邑五百戶進位柱國大將軍

尉遲迴初為西魏文帝帳內都督從太祖復弘農破沙苑皆有功累遷尚書左僕射兼領軍將軍後拜大將軍時梁元帝弟紀在蜀稱帝迴伐破之詔迴為大都督益潼等十八州諸軍事益州刺史以平蜀功遣大鴻臚郊勞仍賜袞冕服孝閔踐祚進位柱國大將軍以迴有平蜀之功同霍去病冠軍之義封寧蜀公爵邑萬戶

梁椿為都督從太祖平侯莫陳悅拜衛將軍右光祿大

夫西魏文帝大統初進爵樂城縣伯增邑五百戶出為隴東郡守尋進爵為公遷梁州刺史從復弘農破沙苑與獨孤信入雒從宇文貴破東魏將堯雄等累有戰功授車騎大將軍儀同三司大都督從戰河橋進爵東平郡公增邑一千戶俄遷侍中驃騎大將軍開府儀同三司又從于謹討稽胡劉平伏椿擒其別帥劉持塞又從獨孤信討岷州羌梁企定破之除渭州刺史又從李弼赴潁川與侯景攻陷韓鎮以功增邑四百戶

梁臺為趙平郡守與太僕石猛破兩山屠各增邑一百
戶轉平涼郡守與刺史史寧破莫折後熾復與于謹破
劉平伏錄前後勲授潁州刺史累遷驃騎大將軍孝明
帝時從賀蘭祥征洮陽先登有功別封綏安縣侯邑一
千戶

王勇為奉車都尉數從侯莫陳悅賀拔岳征討功居多
拜別將太祖引為帳內直盪都督加後將軍從擒竇泰
復弘農戰沙苑所當必破太祖嘆其勇敢賞賜特隆進

爵為公邑一千五百戶拜鎮南將軍授帥都督從討趙
青雀以平之論功居最除衛大將軍殷州刺史加通直
散騎常侍兼太子武衛率邛山之戰勇及王文達耿令
貴三人力戰皆有殊勲太祖於是賞帛二千疋令自分
之軍還皆拜上州刺史後進侍中驃騎大將軍從柱國
趙貴征茹茹破之進爵新陽郡公增邑通前二千戶

宇文虬為征虜將軍從獨孤信在荊州破梁兵於下澧
以功加安西將軍銀青光祿大夫員外直閣將軍閣內

都督封安南縣侯邑九百戶及魏孝武西遷為獨孤信
帳內都督破田八能及擒東魏荊州刺史辛纂虬功居
多尋隨信奔梁魏文帝大統三年歸闕論前後功增邑
四百戶進爵為公擒竇泰復弘農及沙苑河橋之戰皆
有功增邑八百戶進車騎將軍左光祿大夫七年除漢
陽郡守又從獨孤信討梁企定破之十二年出為南秦
州刺史加車騎大將軍儀同三司進驃騎大將軍開府
儀同三司追論斬辛纂功增邑一千戶

賀若敦為驃騎大將軍時岷蜀初開巴西人譙淹據南
梁與梁西江州刺史共為表裏扇動羣蠻太祖令敦率
軍討破之進爵武都公增邑通前一千七百度

權景宣為平西將軍祠部郎中從太祖拔弘農破沙苑
皆先登陷陣轉外兵郎中及東魏將王元凱入雒景宣
與延孫等擊走之以功授大行臺左丞進屯宜陽攻襄
城拔之太祖嘉之徵入朝錄前後功封顯親縣男邑三
百戶

王傑為太祖都督復潼關破沙苑爭河橋戰卬山皆以
勇敢聞親待日隆賞賜加於倫等除岐州刺史加撫軍
將軍銀青光祿大夫進爵為公邑八百戶

宇文深為尚書直事郎中從太祖戰河橋別監李弼軍
討白額稽胡並有戰功進爵為侯

史寧為賀拔勝大都督率步騎一萬攻梁下澁戍破之
封武平縣伯邑五百戶久之遷車騎將軍行涇州事討
破賊帥莫折後熾轉通直散騎常侍後為涼甘瓜三州

諸軍事及討茹茹每戰破之前後獲數萬人進爵安政郡公及吐谷渾通使于齊寧擊獲之就拜大將軍寧遣使詣太祖請事太祖即以所服冠履衣被及弓箭甲稍等賜寧

陸騰為車騎大將軍與安康賊黃衆寶戰大破之軍還拜龍州刺史後為隆州總管討信州蠻蜚前後破平諸賊凡賞得奴婢八百口馬牛稱是

宇文盛為威烈將軍兼都督從太祖擒寶泰復弘農破

沙苑授都督平遠將軍步兵校尉進爵為公增邑八百
戶復遷驃騎大將軍開府儀同三司鹽州刺史及楚公
趙貴謀為亂盛密赴京告之貴誅授大將軍進爵忠誠
郡公除涇州都督賜甲一領奴婢二百口馬五百匹牛
羊及贖田什物等稱是

耿豪一名令貴為征虜將軍從太祖擒竇泰復弘農豪
先鋒陷陣加前將軍中散大夫沙苑之戰豪殺傷甚多
血染甲裳盡赤太祖見之嘆曰令貴武猛所向無前於

是進爵為公增邑通前一千五百戶除鎮北將軍金紫
光祿大夫南郢州刺史又從太祖戰中山當前者死傷
相繼太祖嘉之拜北雍州刺史論前後戰功進授車騎
大將軍儀同三司增邑通前一千八百戶進位侍中驃
騎大將軍開府儀同三司及卒太祖痛惜之贈以本官
加朔州刺史

高琳魏孝明正光初起家衛府都督從元天穆討邢杲
破梁將沈慶之以功轉統軍又從爾朱天光破万俟醜

奴論功為最除寧朔將軍奉車都尉魏孝文西遷從入
關至秦水為齊神武所追拒戰有功封鉅野縣子邑三
百戶進爵為侯增邑四百戶轉龍驤將軍頃之遷平西
將軍加通直散騎常侍從太祖破齊神武於沙苑轉安
西將軍進爵為公增邑八百戶累遷衛將軍又從擒莫
多婁貸文仍戰河橋琳先驅奮擊勇冠諸軍太祖嘉之
曰即我之韓白也拜太子左庶子尋以本官鎮玉壁復
從太祖戰卬山除正平郡守加大都督增邑三百戶又

擊退齊將東方老使人勸琳東歸琳斬其使以聞進
使持節車騎大將軍儀同三司散騎常侍除鄜州刺史
加驃騎大將軍開府儀同三司侍中孝閔帝踐祚進爵
犍為郡公邑一千戶世宗武成初從賀蘭祥征吐谷渾
除延州刺史後遷江陵總管抗陳將吳明徹退之詔琳
入朝親加勞問進授大將軍仍副衛公直鎮襄州進位
柱國及薨贈本官加冀定滄齊等州諸軍事冀州刺史
李和初為賀拔岳帳內都督以破諸賊功稍遷征北將

軍金紫光祿大夫賜爵思陽公

伊婁穆字奴干初為太祖內親信授奉朝請印山之役
力戰有功拜子都督丞相府參軍事累遷撫軍將軍大
都督通直散騎常侍常入白事太祖望見悅之字之曰
奴干作儀同面見我矣於是拜車騎大將軍儀同三司
賜封安陽縣伯邑五百戶孝閔時累遷金州刺史民部
中大夫衛公直出鎮襄州以穆為長史郢州城民王道
骨等反穆討平之進位大將軍入為小司馬從柱國李

穆平軹關等城賞布帛三百疋粟三百石田三十頃

楊紹為輔國將軍從燕國公子謹圍江陵紹鬪於枇杷門流矢中股而力戰不衰事平賞奴婢一百口進驃騎大將軍

王雅為都督從太祖擒竇泰於潼關沙苑之戰所向披靡太祖壯之又從戰印山諸將皆引退雅獨迴騎拒之敵衆稍却雅乃還軍錄前後功進爵為伯

達奚實為大行臺郎中從太祖擒竇泰復弘農破沙苑

皆力戰有功增邑三百戶加車騎將軍左光祿大夫
劉雄為驃騎大將軍力戰齊將段孝先於長城西軍還
遷軍司馬進爵為周昌侯邑一千四百戶

侯植為驃騎將軍從太祖破沙苑戰河橋進大都督加
左光祿大夫涼州刺史宇文仲和據州作逆植從開府
獨孤信討擒之拜車騎大將軍儀同三司封肥城縣公
邑一千戶又從于謹平江陵進驃騎大將軍開府儀同
三司賜奴婢一百口

竇熾初為撫軍將軍從魏孝武西遷仍與其兄善至城
下與武衛將軍高金龍戰於千秋門敗之因入宮城取
御馬四十匹並鞍勒進之行所帝大悅賜熾及善駿馬
各二匹駕馬各十匹又加衛將軍從擒竇泰復弘農破
沙苑皆有功增邑八百戶又從太保李弼討白額稽胡
破之除車騎將軍

竇毅為符璽郎從擒竇泰復弘農戰沙苑皆有功拜右
將軍大中大夫進爵為侯邑一千戶

李穆為都督河橋之戰免太祖於難擢授武衛大將軍
加大都督車騎大將軍儀同三司進爵武安郡公邑一
千七百戶前後賞賜不可勝計久之太祖美其忠節乃
嘆曰人之所貴唯身命耳李穆遂能輕身命之重濟孤
於難雖復加之以爵位賞之以玉帛未足為報也乃特
賜鐵券恕以十死進驃騎大將軍開府儀同三司侍中
初穆授太祖以驄馬及後中廐有此色馬者悉以賜之
韋孝寬為大都督齊神武傾山東之衆志圖西入以玉

壁衝要先命攻之孝寬捍退神武智力俱困遂殂魏文帝嘉孝寬功令殿中尚書長孫紹遠左丞王悅至玉壁勞問授驃騎大將軍開府儀同三司進爵建忠郡公魏恭帝元年以大將軍與燕國公于謹伐江陵平之以功封穰縣公還拜尚書右僕射

元定為襄威將軍從太祖討侯莫陳悅以功拜平遠將軍步兵校尉從擊潼關拔迴雒城進爵為伯增邑三百戶加前將軍太中大夫從擒竇泰復弘農破沙苑戰河

橋元定皆先鋒以前後功累遷都督征東將軍金紫光祿大夫增邑三百戶印山之戰元定殺傷甚衆論功為最賞賜甚厚


楊慟為驃騎大將軍擊破東魏南絳郡虜其郡守屈僧珍錄前後功封邵陽縣伯邑五百戶印山之戰抗禦魏將侯景太祖嘉之賜帛三百疋

李遷哲為車騎大將軍從開府賀若敦討直洋塗三州叛賊平之又克巴州及鹿城軍還太祖嘉之以所服紫

袍玉帶及所乘馬以賜之並賜奴婢三十口加授侍中
驃騎大將軍開府儀同三司除直州刺史即本州也仍
給軍儀鼓節

陽雄為積射將軍從于謹攻盤豆柵復從李遠經沙苑
陣並力戰有功封安平縣侯加冠軍將軍中散大夫賞
賜甚厚復入雒陽戰河橋解王壁圍迎高仲密援侯景
並預有戰功前後增邑四百五十戶世襲邑陽郡守從
大將軍宇文虬攻克上津遷通直散騎常侍都督進儀

同三司



次定回軍全書

冊府元龜

三

冊府元龜卷三百八十二